

# Ina pausa per la lescha da promoziun economica

La regenza è pronta d'acceptar l'incumbensa da deputà Marcus Caduff (pcd Lumnezia)

DA MARTIN CABALZAR

■ **La regenza è pronta d'acceptar l'incumbensa da deputà Marcus Caduff (pcd Lumnezia) che pretenda ina pausa tar la revisiun totala da la lescha per il svilup economic. La regenza è pronta da sistir la revisiun e d'elavurar in rapport davart la situaziun economica che lubescha alur da deducir las strategias necessarias per promover il svilup economic en il Grischun.** Anc la stad 2010 aveva il cussegl grond acceptà – dal reminent cunter la voluntad da la regenza – ina incumbensa da la fracziun socialdemocratica d'elavurar immediatmain in revisiun totala da la lescha per la promoziun da l'economia. Ussa s'entertrais onns d'intensiva lavur da l'administraziun pretenda ina maioritad da las deputadas e dals deputads dentant da metter en tructet la revisiun che n'aveva betg obtegnì bunas notas en la procedura da consultaziun.

## Basa da decisiun insufficienta

Sco quai che *Marcus Caduff* motivescha sia intervenziun n'è la basa preschentada en connex cun la consultaziun betg sufficienta. I manchian tant ina analisa actuala da l'economia dal Grischun sco era las finamiras en tge direziun che l'economia avess da sa sviluppar. «La lescha preschentada na lascha betg vesair ina strategia per far frunt a la spirala negativa che sa manifestescha en la creschientscha sut la media en bleras regiuns, en il regress da las pernottaziuns, en la perdita da plazzas da lavur en l'industria da construcziun etc.», scriva Caduff en sia intervenziun sustegnida da 62 deputads.

Il sbos preschentà na mussia ni il rom



**Deputà Marcus Caduff (pcd Lumnezia) è satisfatg che la regenza è pronta d'acceptar sia incumbensa che pretenda che la revisiun totala da la lescha per la promoziun da l'economia vegnia sistida.**

FOTO M. HARTMANN

ni ils cunfins ni las pussaivladads da la promoziun da l'economia en il Grischun. In sustegn dapertut na saja betg in concept empermettent, i dovria bleranz ina clera focusaziun. Plinavant saja ina colliaziun cun ulteriurs secturs politics sco refurma da las vischnancas, infrastruttura, traffic, energia, ambient, taglias, furma-

ziun e perscrutaziun, sanadad e vegliadetgna necessaria.

Il sbos preschentà na satisfetschia era betg a la pretendiun da la fracziun da la pcd che saja era vegnida sustegnida dal cussegl grond concernent l'elavuraziun d'ina strategia chantunala en favur da las regiuns da muntogna inoltrada sco re-

aziun sin la votaziun davart las abitaziuns secundaras. La politica economica futura dal Grischun na dastgia betg sa restrenscher ad ina singula lescha, mabain stoppia sa basar sin in'analisa chapavla e concisa dal stadi actual e circumscriber las finamiras che duain vegnir cuntanschidas. «Cun fixar ils puncts centrals strategics duain vegnir resguardads cunzunt era fermezzas, premissas e basegns da las regiuns», punctuescha Caduff.

## Portas avertas tar la regenza

En sia resposta constatescha la regenza primarmain ch'il cussegl grond sez haja – dal reminent cunter veglia da la regenza – surdà a quella 2010 l'incumbensa da preschentar «uschè svelt sco pussaivel ina missiva che tegn quint dals interess da las interpresas pitschnas e mesaunas e dals giavischs da l'economia publica en las regiuns periferas». Per elavurar la missiva pretendida stettia uss a disposiziun avunda materal da basa, uschia che la fatschenta pudessia vegnir tractada en la sessiun da december 2013.

Era la regenza è da l'avis che la revisiun totala da la lescha per promover il svilup economic en il chantun Grischun vegnia a pudair contribuir mo ina pitschna part per dumagnar las sfidas cun las qualas l'economia grischuna vegnia confruntada. La regenza punctuescha che ultra da las stentas permanentas d'adattar las interpresas e las branschas al svilup dal martgà ed als giavischs da la clientella sco er ina optimaziun permanenta dals custs gidian era cundiziuns generalas favuravlas dal stadi a meglierar il svilup da l'economia. En quest connex sajan auters secturs politics bler pli impurtants che la promoziun economica en il stretg senn.

E quai tant areguard l'effect sco er areguard ils meds finanziari che stattan a disposiziun en il preventiv.

## Ina focusaziun è necessaria

La regenza parta l'avis da las sutsegnadras e dals sutsegnaders ch'i na possa betg vegnir promovì tut dapertut e ch'i dovria ina focusaziun. Ina tala cuntrafetschia però savens dal tutfatg ad autras pretendiuns concernent il svilup economic, relativescha la regenza. «Malgrà decisiuns dal pievel che vegnan ad avoir – oravant tut en territoris perifers – effects spezialmain fermes desistia la regenza da prender mesiras per mantegnair las structuradas existentas.» La situaziun en ils conturns europeics e mundials mussia clermain nua ch'ina tala politica mainia. Ultra da quai dettia la regenza gronda paisa ch'i na dettia nagin indebliment da la baa legala sche dumondas singulas dad auters secturs politics vegnan regladas materialmain en questa lescha mo perquai ch'i vegn percepi in connex economic, avertescha la regenza.

## La regenza è pronta da sistir la lescha preparada

La regenza constatescha che cun l'incumbensa Caduff che pretenda ina colliaziun da la politica per la promoziun economica en tut ils secturs politics sa midia l'incumbensa dal cussegl grond envers ina revisiun totala da questa lescha essenzialmain. En vista ad ina strategia generala ed a l'allocaziun dals meds finanziari sajan ils singuls secturs politics bler pli impurtants ch'il svilup economic en il senn pli stretg. Perquai è la regenza pronta da sistir la revisiun totala da la lescha per il svilup economic per elavurar in rapport general davart l'economia en Grischun.